


吳越心
氏傳芳



吳越錢氏傳
芳集

嘉慶十有五年九月金匱錢氏謹校重刊



吳越錢氏傳芳集序

宋中散大夫清獻公判官書部郎中知制誥史館修撰知審刑院賜紫金魚袋宋綬撰

錢氏傳芳集者今樞密尚書彭城公纂其宗門歌詩之作也公襲馮厚之祉挺生傑材負幹邦之畧登贊基命參顧託之重任股肱之良欽率攸行顯揚是事且以世祚東夏咸有烈光奉國歸忠勲蓋羣后固已刻之彝器載在甲令而餘力兼劭敏文間作求之故府納楹之書宛存垂于後昆為箕之業逾廣誦清芬而興感期雅旨之彌布繇是錯綜論次以著于篇恭惟武肅王天姿英爽衆藝畢給卓犖稽古感慨發中為之聲詩以類志氣嘗還臨安宅道舊歡甚作詩一闕體大思壯真霸者之

風府中名士如皮羅輩多接酬倡下賢之譽聳於四方
肄于嗣王則乘輯寧之餘多燕申之暇益復崇尚學術
研精漆翰博史所記乃有文穆王之錦樓忠懿王之政
本二集錄焉感於物象盖得江山之助主於教化斯見
君子之體豪賢並出擁青油驅暢轂者靡不造次而服
儒拖華紳襲大裾者率以文雅而稱著藹然遺韻傳于
麗賦凡得格律長言共四十五首合爲一編表以珍名
志於鼎俗每官諱之下躬自訓解槩舉其功行標明其
辭致禮經之飾先美曩哲之述家風煥乎在茲用以無
媿公言成訓典時之宗匠特嗜吟諷清警絕出矧乃荀
里之盛不乏名才謝墅之遊率多佳詠族子僊芝又纂

爲五卷目曰後集繼志之美昭前有裕夫比興之道其
來尚矣握兵經武必求義府之資詒謀教忠爰本詩庭
之訓然而功名自處兼立者特希似續其昌守藝者殊
鮮今乃崇開昭代雕章疊短繡績紛錯金絲交暢播芳
華於藝苑增企慕於吟社孔叢是皆自成一家之範延
州或聽當知大國之風猥屬空踈俾裁序引姑用揄揚
罔窮深奧彼石泉之寶章題集不過毫墨之工趙郡以
花萼名篇僅同昆仲之次悠哉二族非可同日而語也

大昭序

玉池三

玉池三

吳越錢氏傳芳集

武肅王

王諱鏐字具美杭州臨安人唐乾符二年以偏將擊黃巢有功為都指揮使光啓二年拜左衛大將軍杭州刺史景福二年拜鎮海軍節度使潤州刺史乾寧元年加同中書門下平章事二年越州董昌反王以狀聞封彭城郡王浙江東道招討使昌死拜鎮海鎮東軍節度使加檢校太尉中書令賜鐵券恕九死光化元年加檢校太師圖形凌煙閣天福二年封越王天祐元年封吳王梁太祖即位

吳越武肅王第三十世孫



封吳越王兼淮南節度使開平二年加守中書令
乾化元年加尚書令兼淮南宣潤等道四面行營
都統二年尊爲尚父末帝貞明三年加天下兵馬
都元帥開府置官屬龍德元年賜詔書不名後唐
莊宗賜玉冊金印仍天下兵馬都元帥尚父尚書
令吳越國王長興三年三月薨年八十一謚武肅
王善騎射好書精通圖緯學嘗命諸子諷誦詩賦
或爲詩什賜於僚吏往往達旦不寐著有吳越石
壁記一卷大宗譜二卷詩文集二十卷

還鄉歌

三節還鄉兮掛錦衣碧天朗朗兮愛日輝功臣道上兮

列旌旗父老遠來兮相追隨家山鄉眷兮會時稀今朝
設宴兮觥兕飛斗牛無孛兮民無欺吳越一王兮駟馬
歸

青史樓引賓從同登

雲閣霞軒別構雄下窺疆宇壯吳宮洪濤日日來滄海
碧嶂聯聯倚太穹志仗四征平逆孽力扶三帝有褒崇
如今分野無狼字青史樓標定亂功

石鏡山并序

咸通中予方齟齬嘗戲玩臨安山下忽見一石
屹然自立當甚驚異自後便在軍門四十餘年
昨回鄉里復尋此石見巖巒秀拔山勢迴抱堪

金日傳
為法王精舍遂創禪關以此石為尊像之坐表
其感應因成七言四韻

卅歲遨遊在此山曾驚一石立山前未能顯瑞披榛莽
蓋為平寇有歲年昨返錦門停駟馬遂開靈岫種青蓮
三吳百粵興金地永與軍民作福田

築塘

天分浙水應東溟日夜波濤不暫停千尺巨堤衝欲裂
萬人力禦勢須平吳都地窄兵師廣羅刹名高海衆憚
為報龍神并水府錢塘且借作錢城

九日同羣僚登高

并序

遙光素景重九良辰玉露將濃霜天肅物與羣

僚登高四望兼頒錦服聊成七言四韻

淡蕩晴暉雜素光碧峯遙襯白雲長好看塞鴈歸南浦
宜聽砧聲搗夕陽滿野旌旗皆動色千株橘柚盡含芳
錦袍分賜功臣後因向龍山醉羽觴

功臣堂

并序

伏自九五降恩遠頒封冊皇華涉於大海宣命
正值青陽兩邦父老喧然皆來相賀時在功臣
堂設樂聊述七言

今夕雖非豐沛酒醪觥同醉洽吾鄉兩邦父老趨旌府
百品肴羞宴桂堂寶劔已頒王禮盛錦衣重帶御爐香
越王冊後封吳主大國宣恩達萬方

上元夜次序平江南

四朝雙母顯真封古往今來事一同志若不移山可改
何愁青史不書功

西園產芝

五紀尊天立霸基八方隣國盡相知興吳定越崇王道
珍物平克建國儀忽有靈根彰瑞應皆由和氣感明祇
休言漢代芝房異今日吾邦事更奇

羅漢寺偶題

九夏聽蟬吟已知秋氣臨高梧上明月深巷搗寒砧好
對吳山秀宜觀浙水深一登靈鷲閣寶地勝黃金

和高僧惠韻

嵐高照目前山下有蒙泉雲閣連天際銀河傍斗邊涼
風宜散暑清景好安禪况是江山固崇墉保萬年

造寺保民

百穀收成屆應鍾南方景象喜重重三秋甘澤烟塵息
四序和風氣色濃播種勤耕盈廩庾兆民興讓洽温恭
廣崇至道尊三教蓋為生靈奉聖容

秋景

三秋才到退炎光二曜分暉照四方解使金風催物象
能教素節運清凉天垂甘澤朝朝降地秀佳苗處處香
率土吾民成富庶虔誠稽顙荷穹蒼

百花亭題梅二首

穠華園裡萬株梅含蕊經霜待雪催莫訝玉顏無粉態
百花中最我先開

吳山越岫種寒梅玉律含芳待候催為應陽和呈雪貌
遊蜂難覺我先開

和太師蘊讓韻

羅漢親崇建法臺龍峯鳳嶺四山隈遊人借問禪門路
還道吳王為佛開

題羅隱壁

特到儒門謁老萊老萊相見意徘徊黃河信有澄清日

後代應難繼此才

泳謹案吳越備史云隱寢疾王親臨撫問因題其壁云黃河信有澄清日後代應難繼此才隱起而續末句云門外旌旗屯虎豹壁間章句動風雷由是以紅紗罩覆於其上

文穆王

王諱元瓘字明寶武肅王第七子唐乾寧元年制授鹽鐵發運巡官檢校金部郎中賜金紫天復元年改授禮部尚書遙領邵州刺史天祐二年加檢校右僕射梁開平元年承制改內衙都指揮使檢校司空五年正月賜號安國贊正功臣檢校司徒守湖州刺史乾化三年十月封大彭縣開國男四年授光祿大夫進爵開國侯五年勅授鎮海軍節度副使貞明三年加檢校太傅龍德三年授特進檢校太尉兼侍中仍賜匡扶定亂立正至道功臣同光二年制加開府儀同三司檢校太師兼中書

今依前清海軍節度使充兩浙節度觀察留後進
奏使後唐天成元年武肅王不康命王監國八月
勅授王鎮海鎮東兩軍節度使杭州越州大都督
府長史長興三年武肅王薨起復吳越四面都統
鎮海鎮東等軍節度使檢校太師守中書令襲封
吳越國王玉冊金印如故晉天福六年八月薨年
五十五謚文穆王好儒者學善爲詩著有錦樓集
十卷

送別十七哥

大伯東陽軫舊思士民襦袴喜迴時登臨若起鵠原念
八詠樓中寄小詩

題得銅香爐 并序

太歲大淵獻七月七日婺州金華縣招隱鄉有
民李滿于溪中漚麻忽見有香爐自水面直上
當時于溪中得銅香爐一枚又沿溪行二十餘
步覩黃金天尊一軀高一丈八尺金色儼然伏
以玉京金門至妙上真聖功難量玄功莫測道
氣充盈者可以身冲霄極陰德及人者必致福
壽無邊莫盡贊揚卒難叙述今則清溪之內先
吐祥烟綠水之中復呈妙相况今國家方以真
金建制太上僊容才已圓成適當慶禮果符徵
應獲此嘉祥因成短篇用伸恭信

莫記年華隱水中忽于此日覩靈蹤三天瑞氣標金相
五色龍光儼聖容節屆初秋興典教時當千載慶遭逢
仙冠羽服聲清曲共引金臺入九重

忠獻王

王諱宏佐字元祐文穆王第二子晉天福五年承
制授兩浙內牙諸軍都指揮使尋授鎮海鎮東節
度副使檢校太傅天福六年八月文穆王薨九月
即王位承制起復鎮國大將軍右金吾衛上將軍
員外置同正員領鎮海鎮東等軍節度使檢校太
師兼中書令吳越國王仍賜保邦宣化忠正功臣
七年改賜保邦宣化忠正翊戴功臣開運三年制

授東南面兵馬都元帥改賜推誠匡運忠亮威德
功臣四年勅授王諸道兵馬都元帥開府儀同三
司尚書令改賜資忠威武恭懿翊戴功臣是年六
月薨年二十謚忠獻王英明果斷溫柔好禮喜作
詩有集一卷

佳辰小讌寄越州七弟湖州八弟

角黍佳辰社稷寧靈和開燕樂群英樽前只少鴿原會
百里江城隔二城

謁寶塔回賜僧錄

佛日輝光最有靈真身寶塔鎮吳城千尋獨拔乾坤聳
八面齊含日月明幾曲朱欄瞻海浪長時金鐸振風聲

禱祈祇願蒼生泰更仗高僧法供精

忠遜王

王諱宏侗字隆道文穆王第七子起家爲內牙諸軍都指揮使檢校司空晉開運元年出爲東府安撫使累授檢校太尉尋拜丞相四年六月忠獻王薨王即位八月制授爲東南兵馬都元帥鎮海鎮東等軍節度使兼中書令襲吳越國王是年十二月讓位於弟同參相府事忠懿王既立徙王於東府以官物充王取給西寢之後即卧龍山置園亭栽植花木能爲詩亭榭之上紀錄皆滿居二十年而薨謚忠遜著有越中吟二十卷

登卧龍山偶成

暮山重叠勢崔嵬溢目清光入酒杯幾處燒殘紅樹短
一航帆盡碧波來安民未有移風術徵句慙非夢錦才
四望樓臺無限景檻前贏得且徘徊

禹廟

千古功勳孰可倫東來靈宇壓乾坤塵埃共鑠梁猶在
星斗俱昏劍獨存蟾殿夜寒籠翠幌麝爐春煖酌瓊樽
會稽山水秋風裡長放松聲入廟門

登蓬萊閣懷武肅王

黃鶴摧殘漫有名建時方始殄羅平飛梯疊拱重裝束
刻檻雕甍又葺成十載興隆吳與越二邦安肅弟兼兄

從茲登賞雲樓上願祝江南永宴清

再遊聖母閣

越地靈蹤多少處伽藍難上此樓臺有時風掣浪聲到
半夜月排山勢來極目烟嵐迷遠近百般花木離塵埃
可憐光景吟無盡知我登臨更幾迴

忠懿王

王諱宏俶字文德文穆王第九子晉天福四年制
授內牙都指揮使檢校司空忠獻王時累贈特進
檢校太尉開運四年三月授台州刺史忠遜王立
徵王同參相府事漢乾祐元年正月朔諸將迎立
王即日以鎮海鎮東等軍節度使檢校太尉兼侍

中蒞事元帥府二年勅授東南面兵馬都元帥鎮
海鎮東等軍節度使浙江東西等道管内觀察處
置兼兩浙鹽鐵制置發運等使開府儀同三司檢
校太師中書令杭州越州大都督上柱國吳越國
王仍賜匡聖廣運同德保定功臣冬十月冊王爲
吳越國王仍賜玉冊金印三年加授尚書令增食
邑周廣順元年加王諸道兵馬都元帥仍降尚書
冊禮二年授天下兵馬都元帥改賜推誠保德安
邦致理忠正功臣三年授王起復鎮東大將軍左
金吾衛上將軍員外置同正員顯德元年加授王
天下兵馬都元帥賜號崇仁昭德宣忠保慶扶天

金氏傳文集 九
翊亮功臣仍賜金印大宋龍興授王天下兵馬大
元帥乾德元年改賜承家保國宣德守道忠貞恭
順功臣二年制王起復天下兵馬都元帥開寶元
年仍封爲吳越國王七年授王東南面招討制置
使八年又加授太師尚書令九年入覲京師太平
興國二年勅授王尚書令兼中書令三年納疆土
歸于朝制依前守太師尚書令兼中書令改封淮
海國王仍充天下兵馬大元帥改賜寧淮鎮海崇
文耀武宣德守道功臣雍熙元年改封漢南國王
四年又改封南陽國王未至國又改封許王又徙
封鄧王是年八月廿四日薨年六十追封秦國王

謚曰忠懿王雅好詩書善吟咏著有政本集十卷
相國元德昭翰林學士陶穀爲之序云

宮中作

廊廡重重翠幙遮禁林惟此絕喧譁界開日影憐窻眼
穿破苔紋惡笋芽曲檻晚宜供露茗小池寒欲結冰花
謝公未是深沉量猶把戎機局上誇

過平望

風靜度長川清吟倚畫船未分山有樹惟見水連天沙
嘴牛眠草波心鳥觸烟宵征還有興皎皎玉輪圓

讀聖壽詩

功格皇天僞國平八方臣妾盡來庭駿奔幸逐朝宗水

金氏傳集
崔躍俄逢繞電星就日心雖懸紫闕祝堯身尚處洪溟
壽山聳峙將何願泰華干霄萬仞青

感皇子遠降見迎

千年遭遇覲真王敢望青宮賜顯揚祇合承華趨令德
豈宜中道拜元良深思轉覺乾坤大力弱難勝雨露滂
蚤暮三思恩泰極飽餐豐饌飽親光

感降內夫人賜家室藥物金器

魚軒相逐拜龍軒聖主俄推望外恩錫寵便藩光石窳
內嬪迢遞下金門嵩衡壓地何曾重雞犬昇仙未足論
巨慙已平難展報祇將忠孝訓兒孫

金陵

不用論京口先須問石頭虎山終自伏帶水漫長遊青
蓋曾彰識黃奴肯識羞分明前監在剛地弄戈矛

過楚州

駐馬楚城南秋光帶雨寒地平無島嶼淮近足波瀾聖
德常柔遠蒸民賴此安行吟復行酌朝野正多歡

陳國

批破陳書後都無禦敵心庭花春易盡璧月夜難沉巨
爵妖姬醉新詩狹客吟江神如訪問教到井中尋

路次再感聖恩

洪濤泛泛雨霏霏芳草如茵柳裊絲貼水碧禽飛一字
隔烟青嶂展雙眉南風入隙開襟久西照臨窓捲箔遲

慙愧聖恩優渥異不教炎暑冒長岐

小窓

粉雲牙貼小窓涼坐見澄波泛夕陽更待夜深方有意
半環新月上重床

舟中偶書

輕舟畫舸枕江濱眼底波濤日日新瞑目穩收雙足坐
不勞詢問醉禪人

村家

竹樹參差處危墻獨木橫鋤開芳草色放過遠灘聲稚
子當門卧雞雛上屋行騎牛帶蓑笠侵曉雨中耕

漁者

罟網是生涯柴扉隔水遮不辭粗俗氣惟取大魚蝦貫
酒方登陸憐春亦種花等閒乘一葉放曠入烟霞

富水侯昱

字就之忠獻王長子承制授秀州刺史歷台州温
州刺史福州節度使太平興國二年詔除州刺史
忠懿王奉土歸朝公從至闕改領台州刺史又移
知宋州改工部侍郎歷典壽泗宿三州至道二年
授郢州團練使咸平二年卒贈太師封富水侯著
有貳卿文藁二十卷太平興國錄一卷竹譜三卷

題巾山翠微閣

數級崔嵬萬木中最堪影勢是難同闌干夜壓江心月

鈴鐸秋搖岳頂風
重疊畫檐遮世界
稀疏清磬徹虛空
有時問著禪僧路
笑指丹青去不窮

秘書監昆

字裕之忠遜王第十子從忠懿王入朝淳化三年
第一甲進士除楚州寶應縣主簿入爲三司判官
出知廬州改濠州天聖中爲禮部郎中知泉州累
遷至右諫議大夫以秘書監卒于家年七十六著
有諫議詩文集十卷

題淮陰侯廟

築臺拜日恩雖厚
躡足封時慮已深
隆準早知同鳥喙
將軍應起五湖心

遊鐵岸

晴紅烟綠襯虛亭
公退因來得野情
落日東風嬾歸去
擬將薄祿換溪聲

翰林學士易

字希白忠遜王第十二子咸平二年第一甲第二
名進士授濠州團練推官歷光祿寺丞通判蘄州
除秘書丞遷太常博士尚書戶部員外郎改度支
員外郎兵部員外郎天禧四年與祖士衡並知制
誥改戶部左司二郎中天聖三年爲翰林學士四
年卒著有金閨瀛洲西垣待制等集總一百五十
卷南部新書十卷青雲總錄一百卷洞微志三卷

滑稽集四卷

温泉

悲哉天寶時帝耄政不修寵幸尊婦人陰極陽已柔外
戚盛本枝節比封列侯丞相大將軍備位甚悠悠天下
安既久積漸力不周車服金玉煥黎庶饑寒愁驪山温
泉宮晝幸與夜遊一遊百司備萬費一日休誰能心目
快化作社稷憂國忠恣吞噬林甫懷姦偷胡離亂太原
鐘鼓無計收黃塵滿長安慘黷九廟羞唐天未始絕返
正知疾瘳自茲遊賞地荆棘生荒秋舊物悉已廢蜘蛛
掛重樓覽者咸寒心一過三回頭因知帝王業堅固宣
鴻猷豈可信嗜欲侮弄生瘡疣雕墻峻宇誠簡牘况有

由翻思黍離章讀之應可仇

南兵

曾見南兵苦征遼事一如金瘡寒長肉紙甲雨生蛆山
小壑霜骨河枯臃腐魚黎元無處哭丁戶日相踈

送張無夢歸天台

暫謁明光拂斗槎杖藜歸去赤城霞琳宮重啓仙人室
金闕新辭太帝家祇自運心奔白日何須擲米作丹砂
雲章賜重崆峒遠還向懸岑鍊五芽

擬張籍上裴晉公

午橋莊上千竿竹綠野堂前白日春富貴極來唯嘆老
功名高後轉輕身嚴更未報皇城裏勝賞時遊洛水濱

昨日庭趨三節度淮西曾是執戈人

嵇康小舞詞 并序

薛九江南富家子得侍宮中善歌舞嵇康嵇康
江南曲名也學舞于鍾離氏建業破零落于江
北余遇于洛陽福善坊趙春舍飲酣于是歌嵇
康其詞即後主所製焉嘗感激坐人皆泣春舉
酒請舞謝曰老矣腰挽衰硬無復舊態乃強起
小舞終曲而罷座有王生者請余爲嵇康小舞

詞

薛九三十侍中郎蘭香花態生春堂龍盤王氣變春霧
淮聲哭月浮秋霜宜城酒煙濕羈腹與君強舞當時曲

玉樹遺辭莫重聽黃塵染鬢無前綠我聞襄陽白銅鞮
荒情古艷傳幽悲淒涼不抵亡國恨塵中苦淚飛柔絲
洛陽公子擎銀觴跪奴和曲生輝光茂林旅夢無春草
彤管含羞裁短章

西遊曲

花銷秋老白日短敗紅荒綠迷空館擬將清血灑昭陵
幽谷蛇啼半山晚十年辭家勤獻書王孫不許延公車
江頭祖廟祭無血重門生草寒離離我有王孫三尺劍
姦骨餘痕古波艷佩入函關無故人玉握凋零七星暗

彭城郡王惟治

字和世忠遜王長子忠懿王愛之養爲己子八歲

授兩浙牙內諸軍都指揮使判軍糧營田事宋開寶元年忠懿王入朝以惟治權發遣吳越軍國事太宗嗣位加檢校太尉忠懿王封淮海國王授華州節度使忠懿王薨特進檢校太師真宗嗣位加開府儀同三司累加左驍衛上將軍大中祥符七年卒年六十六贈太師追封彭城郡王生平慕皮陸爲詩有集十卷

春日登大悲閣回文

聖主欽崇教千光顯紺容映雲窻綺暖籠月箔花重淨刹香風遠危闌碧霧濃勝因良以詠華國一斯逢

嘉慶十有五年七月朔日
武肅三十世孫鋒同校字

泳謹案讀書敏求記及列朝詩集小傳俱載有吳越錢氏傳芳集一卷傳芳後集五卷宋綬爲序先君子在時購覓三十餘年不得嘉慶元年泳遊武林從關晉軒侍郎家得明人抄本乃忠靖公象祖十二世孫楞所刊上卷自武肅王至浙東提刑共二十四人下卷自淡軒先生至石泉生共三十八人總詩一百三十二首後題云傳芳集者吾先文僖公所輯五王歌詩也外乎王者遺矣故校理公復有續集後屢經兵火是集亦幾乎亡迄今且二百餘載吾叔祖清溪固山二公復相與搜集爰剔一二用鈔諸梓圖弗亡也據此則不但卷帙之不同而原本前集所稱四十五

首者亦非其舊矣泳因採錄全唐詩並續慶系譜宋詩記事等書自武肅王至彭城郡王詩合四十五首而以宋序冠於編以還其舊自文僖公以下所錄詩尚多異日擬再刻後集以繼校理公續集五卷之舉也嗚呼吾祖武肅王保民立國至忠懿王納土順天受吳越之雙封垂子孫于千禩位極富貴善始善終伊古以來蓋未之有也泳不肖不能讀書然尚欲承先君子志纂述德編百卷以廣餘聞庶幾成一家言文獻有足徵矣嘉慶十五年九月吳越武肅王三十世孫錢泳謹識於虞山之釣渚新居

大興王氏蕉露館藏書

晉甲午

